

दिनांक 27.04.2025

समय: 18.45 बजे

आकाशवाणी जयपुर-अजमेर

प्रादेशिक समाचार

- प्रधानमंत्री नरेन्द्र मोदी **मन की बात** कार्यक्रम मांय कह्या-पहलगाम हमला रा दोषियां अर षड्यंत्रकारियां ने करड़ो जवाब दियो जावेला-पीड़ित परिवारां ने न्याय रो भरोसो दिरायो।
- प्रधानमंत्री खेतीबाड़ी मांय नवाचारां खातर काश्तकारां री सराहवणा करी- राजस्थान रा लीची उत्पादक जितेन्द्र सिंह राणावत रो जिकर कर्या।
- राष्ट्रीय अन्वेषण अभिकरण-एनआईए पहलगाम आतंकी हमला रा मामला मांय सबूतां री तलाश मांय तेजी करी।
- प्रदेश मांय केई ठोडां माथे लू रो असर-काल सूं बत्ता तापमान मांय 2 सूं 3 डिग्री सेल्सियस री बढ़ोतरी रा आसार।

000

प्रधानमंत्री नरेन्द्र मोदी मन की बात कार्यक्रम रा 121वां एपीसोड मांय आज पहलगाम हिंसा, देश रा अंतरिक्ष रा हलका मांय काम, काश्तकारां री मेहनत, विश्व पटल माथे भारत रो मान बढ़ाबा समेत केई मुद्दा माथे आपरा विचार साझा कर्या। आकाशवाणी सूं प्रसारित होबा वाळा मासिक कार्यक्रम मांय श्री मोदी आपरा सम्बोधन मांय सब ऊं पैली पहलगाम आतंकी हमला माथे गहरो दुःख जताया। वे कया के देश रो हर नागरिक पीड़ितां रे सागे है अर इण हमला रो करारो जवाब दियो जावेला। प्रधानमंत्री आतंकवाद रे खिलाफ एकजुट होर लड़बा री अरज करी।

प्रधानमंत्री कया के भारत आज ग्लोबल स्पेस पॉवर बण चुक्यो है। वे कया के देश स्पेस सेक्टर ने निजी हलका खातर खेल दियो है अर आज बत्ता मोट्यार स्पेस स्टार्टअप सूं जुड़ रह्या है।

प्रधानमंत्री **एक पेड़ मां के नाम** अभियान री सफलता रो जिक्र करता थकां कया कै यो पर्यावरण ने सुधारबा री दिशा मांय बड़ो कदम है। श्री मोदी खेती मांय नवाचारां री चर्चा करता थकां काश्तकारां री नई सोच री सराहवणा करी। वणा राजस्थान रा किसान जितेन्द्र सिंह राणावत रो जिक्र करता थकां कया के वणा लीची उगाबा मांय सफलता हासिल करी है। प्रधानमंत्री कया के यो उदाहरण लोगां ने प्रेरित करबा वाळो है। मन की बात कार्यक्रम मांय प्रधानमंत्री दिवंगत वैज्ञानिक डॉ. कस्तूरीरंगन रा योगदान ने भी याद कर्या। म्यामार मांय आया भूकम्प री बात करता थकां वणा **ऑपरेशन ब्रह्मा** माथे भारत री भूमिका रो जिकर कर्या।

प्रधानमंत्री नरेन्द्र मोदी रो 'मन की बात' कार्यक्रम प्रदेशभर मांय न्यारी-न्यारी ठोडां माथे सुण्यो गयो। प्रदेश भाजपा कार्यालय मांय अहलकार अर कार्यकर्ता इण कार्यक्रम ने भेळा मांय सुण्या। वटी ने मुख्यमंत्री भजनलाल शर्मा मुंबई एयरपोर्ट माथे 'मन की बात' कार्यक्रम सुण्या। मुख्यमंत्री कया के इण कार्यक्रम रे जरिये प्रधानमंत्री श्री मोदी भारत री विकास यात्रा रा बारा मांय बतावे है। इण रे सागे ही समाज रा हर एक वर्ग ने राष्ट्र निर्माण मांय सक्रिय भागीदारी खातर प्रेरणा देवे है।

000

राष्ट्रीय अन्वेषण अभिकरण—एनआईए गृह मंत्रालय रा आदेश रे पाछे पहलगाम आतंकी हमला री जांच औपचारिक रूप सूं सुरू कर दी है। एनआईए री टीमां घटना रे पाछे सूं ही मौका माथे है अर वणा सबूतां री तलाश तेज कर दी है। एनआईए रे मुजब आईजी, डीआईजी अर एसपी रैंक रा अहलकारां री निगराणी मांय केई दळ अठे काम कर रह्या है। ये दळ हमला री टेम वठे मौजूद लोगां सूं पूछताछ कर रह्या है। इण ने हाल ही रा बरसां मांय कश्मीर मांय व्ह्या सब ऊं गंभीर आतंकी हमला मांय सूं एक मान्यो जा रह्यो है।

कांग्रेस महासचिव सचिन पायलट आज जयपुर मांय खबरनवीसां सूं बातचीत मांय कह्या के आतंकवाद रे खिलाफ लड़ाई मांय पूरो देश एकजुट है। आतंकियां ने मुंहतोड़ जवाब देवणो चाहिजै।

पहलगाम आतंकी हमला रे पाछे प्रदेश मांय पुलिस अलर्ट मोड माथे है। कानून व्यवस्था बणाया राखबा खातर केई भांत री सावचेती बरती जा री है। आज सवाईमाधोपुर, झालावाड, जालौर अर पाली समेत केई जिला कलेक्टर वीडियो कॉन्फ्रेस रे जरिये बैठक ली। इण दौरान पुलिस प्रशासन रा अहलकारां ने पुख्ता मॉनिटरिंग तैय करबा रा निर्देश दिया।

000

राज्य सरकार वित्तीय प्रशासन मांय पारदर्शिता, दक्षता अर जागरुकता ने बढ़ाबो देबा खातर महताऊ पहल करी है। इण खातर एक एमओयू माथे दस्तखत कर्या गया। बत्ती जाणकारी समाचार कक्ष सूं म्हाकी सहयोगी सालेहा गाजी सूं—

000

केन्द्र सरकार सोशल मीडिया प्लेटफॉर्म्स माथे जारी सेना रा आधुनिकीकरण खातर बैंक खाता खोलबा रा संदेश ने फर्जी बतायो है। पत्र सूचना कार्यालय री फैक्ट चैक यूनिट इण संदेश ने पूरी भांत गलत बतायो है। पीआईबी रे मुजब सरकार युद्ध मांय जान देबा वाळा अर आतंकी कार्यवाही मांय घायल सैनिकां ने तुरत माळी सहायता देबा खातर कोष री थापना करी है। इण रो इस्तेमाल सेना रा आधुनिकीकरण या हथियार खरीदबा खातर नी कर्यो जावेला।

000

000

प्रदेश मांय आज झालावाड, चूरू, बाडमेर अर बालोतरा समेत केई ठोडां माथे जोरदार गर्मी अर लू रो असर रियो। बीत्या 24 घंटां मांय बाडमेर मांय बत्तो तापमान 43 दशमलव 9 डिग्री सेल्सियस मापी ज्यो। इण रे इतर, धौलपुर, जैसलमेर, फलौदी, बीकानेर अर श्रीगंगानगर मांय भी पारो 43 डिग्री सेल्सियस रे पार दरज व्ह्यो। मौसम महकमा रे मुजब काल सूं बत्ता तापमान मांय 2 सूं 3 डिग्री सेल्सियस री बढ़ोतरी रा आसार है। जोधपुर अर बीकानेर संभाग मांय कुछेक ठोडां माथे तापमान 44 सूं 46 डिग्री रे बीच रह सके है।

000

हरियाळो राजस्थान अभियान रे तैत प्रदेश मांय इण माली बरस मांय दस करोड़ पौधा लगाबा रो लगस राख्यो गयो है। इण सूं पौधा रोपण अभियान ने नुवी गति मिलेला। इण ई कड़ी मांय कोटपूतली—बहरोड़ जिला ने भी प्रशासन अर वन महकमो हरयो भरयो बणाबा मांय जुट्यो है। जिला कलेक्टर कल्पना अग्रवाल बताया के अभियान ने जनता री इमदाद रे सागे बड़ा पैमाना माथे राख्यो जावेला।

000

पाली जिला री मेंहदी विश्व प्रसिद्ध है। जिला रा सोजत अर आरे—सारे रा हजारू हैक्टेयर इलाका मांय मेंहदी री पैदावार होवे है। सुर्ख लाल रंग देबा वाळी इण मेंहदी री दुनिया रा केई देशां मांय घणी मांग है। आं दिनां मेंहदी री कीमतां मांय व्ही बढ़ोतरी सूं काश्तकारां अर व्यापारियां मांय घणो उच्छाव है। बत्ती जाणकारी म्हाका खबरनवीस सूं—

000

राजस्थान लोक सेवा आयोग री कानी सूं होबा वाळी प्राध्यापक विद्यालय प्रतियोगी परीक्षा-2024 खातर काल सूं आवेदन पत्र भरया जा सकेला। आयोग न्यारा-न्यारा विषयां खातर ऑनलाइन आवेदन भरबा खातर न्यारी-न्यारी तारीखां माथे लिंक खोलबो रो फैसलो करया है। वठी ने कांस्टेबल भर्ती 2025 खातर आवेदन प्रक्रिया भी काल सूं सरु व्हेला। ये आवेदन 17 मई तांई ऑनलाइन भर्या जा सके है। इण रे जरिये कांस्टेबल रा 9 हजार 617 खाली पदां माथे भर्ती करी जावेला। इण बीच आज राजस्थान स्वास्थ्य विज्ञान विश्वविद्यालय री मेडिकल ऑफिसर परीक्षा जयपुर मांय न्यारा-न्यारा केन्द्रां माथे राख्यी गई। इण रे जरिये 1 हजार 700 पदां माथे भर्ती करी जावेला।

000

परशुराम जयंती 30 अप्रैल ने मनाई जावेला। इण सिलसिला मांय आज भरतपुर मांय वाहन रैली काढी जा री है। कोटा अर उदयपुर मांय भगवान परशुराम रा प्राकट्य महोत्सव रे तैत शोभायात्रा काढी जा री है। वठी ने पाली मांय रक्तदान अर निःशुल्क चिकित्सा शिविर लगाया गया।

000